



# Сыр бойы

Қызылорда облыстық қоғамдық-саяси газет • 1929 жылдың 1 шілдесінен шығады

№25  
(20299)



СУБЕЛІ СӨЗ

- Ынтымақ – бұзылмайтын қорған, Қосылып ескен ағаш – орман.
- Бірлігі бар елдің, Белін ешкім сындырмас.
- Жұрт келгендей жиын болсын, Жұмылған қолдай ұйым болсын.

15 ақпан, сейсенбі 2022 Жыл

e-mail: syrboyi@yandex.kz / www.syrboyi.kz

www.facebook.com/syrboyi.kz/

www.instagram.com/syrboyi\_kz

https://twitter.com/syrboyi

t.me/syrboyi\_kz



## Телефон арқылы сөйлесті

Президент Қасым-Жомарт Тоқаев Түрікменстан Президенті Гурбангулы Бердімұхамедовпен телефон арқылы сөйлесті.

Мемлекеттер басшылары екіжақты қарым-қатынастарды одан әрі нығайтудың перспективаларын, оның ішінде Қазақстан Президентінің былтырғы қазан айында Ашхабадқа жасаған мемлекеттік сапарының қорытындысы бойынша қол жеткізілген уағдаластықтардың іске асырылу барысын талқылады.

Президенттер өзара сауда-саттық көлемінің артқанына, энергетика, көлік, өнеркәсіп және ауыл шаруашылығы салаларындағы ынтымақтастықтың жанданғанына көңілдері толатынын айтты. Әңгімелесу барысында мемлекеттер басшылары бауырлас екі ел арасындағы сауда-экономикалық, инвестициялық және мәдени-гуманитарлық байланыстарды одан әрі кеңейтуге ниетті екендерін атап өтті.

Қасым-Жомарт Тоқаев Түрікменстан Президентіне шынайы құрметін білдіре отырып, Гурбангулы Бердімұхамедовтің кезектен тыс президент сайлауын өткізу жөніндегі шешімін қолдайтынын мәлімдеді. Қасым-Жомарт Тоқаевтың айтуынша, Түрікменстан басшысының саяси әрі өмірлік мол тәжірибесі осы мемлекеттің өркендеуіне септігін тигізетіні сөзсіз.

## Бақылау күшейе түсті

Мемлекет басшысы Қасым-Жомарт Тоқаев Қаржылық мониторинг агенттігінің төрағасы Жанат Әлимановты қабылдады.

Кездесуде агенттік төрағасы Президент тапсырмаларының орындалуына қатысты атқарып жатқан жұмыстары туралы есеп берді. Ведомство капиталды заңсыз шығаруға жол бермеу мақсатында қаржы реттеушілермен бірлесіп, күмәнді трансшекаралық аударымдарға күшейтілген мониторинг жасау ісін жолға қойған.

Қасым-Жомарт Тоқаевқа биыл тоқталатын күдікті операциялардың саны 3 еседен асқаны және олардың жалпы құны 150 млрд теңгеге жуық екені баяндалды. Осы деректер бойынша тексеру шаралары жүргізіліп жатыр. Агенттіктің мәліметі бойынша шетелге ақша қаражатын шығарудың күрт көбейгені байқалмайды. Керісінше биыл шетелге аударылған қаржы 30 пайызға азайған.

Жанат Әлимановтың айтуынша, мүдделі органдармен бірлесіп, қолма-қол валютаны заңсыз шығаруға бақылау күшейтілген. Жалпы сомасы 5 миллион АҚШ долларына жуық заң бұзушылық анықталған.

Сонымен қатар Қазақстан-Қытай шекарасында тексеру жұмыстары жүргізіліп жатыр. Үш аптаның ішінде тауарды заңсыз әкелу фактілері бойынша 8 қылмыстық және 24 ақпараттық іс қозғалды.

Нәтижесінде, тауар импорты көлемінің азаюына қарамастан, биылғы қаңтар айында бюджетке түскен кедендік төлемдер мен салықтардың мөлшері 20 пайызға (26,6-дан 31,7 млрд теңгеге дейін) өсті.

Сонымен қатар Мемлекет басшысына қоғамдағы маңызды әлеуметтік мәселелерді шешуге бағытталған жұмыстар туралы мәлімет берілді. Атап айтқанда, «Тариф» жобасы бойынша коммуналдық қызметтердің 17 миллиард теңгеге өсуіне әкеп соқтыруы мүмкін 1,3 миллион азаматтың негізсіз шығынына жол берілмеді. 13 іс қозғалды (сүмен жабықтау – 8, газбен жабықтау – 3, жылумен жабықтау – 2).

Президент жариялаған «Балалар жылы» аясында Бала құқықтары жөніндегі уәкілмен бірлесіп, «Қамқор» жобасы жүзеге асырылуда. Бұл жоба халықтың әлеуметтік жағдайы төмен топтарын қорғауға бағытталған. Нәтижесінде 45 іс бойынша 800 жетім баланың құқығы қорғалды.

Кездесу қорытындысы бойынша Мемлекет басшысы көлеңкелі экономикаға қарсы күресу үшін Агенттік төрағасына тиісті шаралар қабылдау жөнінде тапсырма берді. Президент заңсыз немелденген активтерді, соның ішінде шетелден іздеуге баса мән беру қажет екенін, сондай-ақ оларды Қазақстанға қайтару жұмыстарын жандандыру керектігін айтты. Бұл жұмыстардың бәрі тұлғаның кім екеніне және лауазымына қарамай жүргізілуі тиіс.

## ● ПРЕЗИДЕНТ



## Мемлекет басшысы Қасым-Жомарт Тоқаевтың қаңтар оқиғасы кезінде қайтыс болған азаматтардың рухына мешітте құран бағыштағаннан кейін халыққа жасаған үндеуі

### Ардақты ағайын!

Биылғы жыл еліміз үшін қайғылы оқиғадан басталды. Халқымыз өте қиын сынақты бастан өткерді. Мемлекетіміздің тұтастығына, азаматтарымыздың қауіпсіздігіне, еліміздің болашағына қауіп төнді. Біз лаңкестерге дер кезінде тойтарыс беріп, бетін қайтардық. Өкінішке қарай, дүрбелеңде көптеген азаматымыз қаза тапты. Бұл – нағыз қасірет.

Қазіргі таңда тиісті мекемелер азаматтардың әрбір ісі бойынша тергеу жұмыстарын жүргізіп жатыр. Адам құқығын қорғау мәселесі мен үшін аса маңызды. Қайғылы жағдай бүкіл елдің қабырғасын қайыстырды. Осыған байланысты Жалпыұлттық аза тұту күнін жарияладық.

Сол қасіретті оқиғадан бері 40 күн өтті. Бүгін марқұмдардың рухына құран бағыштау үшін мешітке арнайы келдім. Қаза болған адамдар-

дың жақындарына тағы да көңіл айтамын.

Мемлекет қаралы шаңырақтарды қараусыз қалдырмайды. Мен қайтыс болған азаматтардың отбасыларына қаржылай көмек көрсетуді тапсырдым. «Қазақстан халқына» қоры да осы қайырымдылық жұмысқа атсалысады деп ойлаймын.

Енді халқымыздың береке-бірлігі мен тыныштығын бұзуға жол бермейміз. Бұл – биліктің ғана емес, барша азаматтарымыздың ортақ борышы. Мұндай қасірет ешқашан болмасын! Қазақстан халқына сабыр тілеймін!

Бәріміз тұтас ел болып, Жаңа Қазақстанды құрайық! Жаңа Қазақстан – баршамыздың ортақ үйіміз, оның іргесін бірге қалайық! Бұл өскелең ұрпақ үшін керек.

Еліміз аман, жұртымыз тыныш болсын!

## Телеарналардың өрісті қызметі



Ақпараттың сәт сайын жаңарып отыратын кезеңінде жылдам хабар таратуда телеарналардың орны ерекше. Әсіресе, қасіретті қаңтар оқиғасы кезінде ақпарат таратуды екі есеге күшейткен «QYZYLORDA» және «QOGAM» телеарналары халыққа шынайы деректерді жеткізе білді. Кеше облыс әкімі Гүлшара Әбдіқалықова қос телеарнаға барып, редакцияның шығармашылық ұжымымен кездесті.

Алдымен өңір басшысы «QYZYLORDA» арнасының материалдық-техникалық базасымен танысты. «Жаналықтар» қызметінің ақпараттық-студиялық блогы, виртуалды студия мен түсіру павильонының жұмысын көрді.

Телеарна директоры Жағыппар Қарабала ақпараттық саясатты қалыптастыру ісіндегі телеарнаның үлесі мен журналистер арасындағы сабақтастықты ерекше атап өтті. Сонымен бірге облыс әкімі телевизия саласының ардагерлері, журналистер және эфир тізгініштерімен пікірлесіп, ақпараттық

контентті әрі қарай ілгерілету жолдарын сөз етті.

Телестудия алаңына келген облыс әкімі жана форматтағы «11 студия» бағдарламасының қонағы болып, Сыр халқын алаңдатқан сұрақтарға жауап берді. Сұхбатта қасіретті қаңтар оқиғасы, егінге дайындық барысы, Сырдария өзені суының жағдайы мен өңірдің әлеуметтік-экономикалық дамуы, инвестициялық жобалар мен кәсіпкерлік мәселелері қозғалды.

Мұнан кейін аймақ басшысы «QOGAM» телеарнасына барып, ұжыммен кездесті.

Жаппай тәртіпсіздік кезінде облыстық сот ғимаратында орын алған өрт телеарнаға да залалын келтіріп, бірнеше кабинеттер мен шағын студияны да от шарпыған. Қазір телеарна жұмысын қайта қалыпқа келтіріп, хабар таратуды жалғастыруда.

Телеарна құрылтайшысы Шәкізата Әбдікәрімова сандық хабар тарату форматына көшіру мәселелері мен жас журналистердің тәжірибесін толықтыру сынды ойын ортаға салды.

Облыс әкімі телередакция ұжымына шығармашылық табыс тілеп, мемлекеттік саясатты ақпараттандыру, өңірдегі өркенді істерді тұрғындарға жеткізу ісінде табандылық танытып жүрген БАҚ өкілдеріне шынайы алғысын жеткізді.

Облыс әкімінің баспасөз қызметі

## ● МЕЗГІЛ МӘСЕЛЕСІ

Мемлекет басшысы Қасым-Жомарт Тоқаев өткен айда мәжіліс отырысында Үкіметке «ӨКМ операторы» компаниясының ұтып алынғанына нәтижесіз стейт бойынша іс-шаралар қабылдауды тапсырған болатын. Ақпанның соңына дейін кәдеге жарату алымының жаңа мөлшерлемесі ұсынылатын болды. Сондай-ақ, Индустрия және инфрақұрылымдық даму министрлігі жеңілдетілген автонесие бағдарламасын әзірлеуде.

Сб Биболат СӨТЖАН, «Сыр бойы»



Индустрия және инфрақұрылымдық даму министрлігінің бұл жобасына қазірдің өзінде екінші деңгейлі банктерден 15 мыңнан астам өтінім түскен. Бағдарламаға кез келген қазақстандық азамат қатыса алады. Алайда олардың қандай да бір несиесі бар-жоғы мен қарызды қайтару мүмкіндігін зерттеп, автонесиені беру-бермеу жөніндегі шешімді банк қабылдайды.

3-бет

## ● БҮГІН – КЕҢЕС ӘСКЕРЛЕРІНІҢ АУҒАН ЖЕРІНЕН ШЫҒАРЫЛҒАН КҮНІ

## Азаматтар ардақталса игі

Биыл Кеңес әскерлерінің Ауған жерінен шығарылғанына 33 жыл толды. Нақтырақ айтқанда, 1989 жылы 15 ақпанда Ауғанстаннан соңғы Кеңес әскерлерінің әкетілуі аяқталған еді.

Сб Ержан ҚОЖАСОВ, «Сыр бойы»

Бас-аяғы 110 айға созылған соғыс қанша жауынгердің өмірін қиып кетті, қаншамасы мүгедек болып елге оралды. Деректер бойынша, Қазақстаннан Ауған соғысына 22 мыңнан астам жауынгер барған. Оның ішінде 827 адам біздің облыстан аттанса, оның 18-і сонда қаза тапқан.

– Оның ішінде 30-дан астам

жігіт әртүрлі жарақатпен мүгедек болып оралды. Қазір Ауған жерінде болған жігіттер 600-ге жетпейді. Сол жақтан оралысымен о дүниелік болғандар бар. Әсіресе, кешегі пандемия кезінде де 7-8 азаматтан айырмалық. Шыны керек, жасы келген сайын олардың да жағдайы нашарлап келеді. Сенсеңіз, соғыстан жүйкесі жұқарған жігіттеріміздің



кейбірі суицидке барды. Өйткені, жүйке тозған, – дейді Ауған соғысының ардагері, аймақтағы «Ерлік» үйлестіру кеңесі» қоғамдық бірлестігінің төрағасы Қайрадин Баймаханов.

Жыл сайын атаулы күні ғана Ауған соғысына қатысқан ағаларды іздейтіміз өтірік емес. Ұрпаққа «міне, осындай әкелер жат жерде Отанын қорғады» деп баға беретін ардагерлердің саны жыл сайын азайып барады. Көбі жоғарыда айтқандай, ішкі жан күйзелісінен арылмай, ауру арқалағандар. Соғыс салған жараның кесірінен кеселге ұшырағандар.

4-бет





